

Rycond do Nascimento:

E relevancia historico y actual di Betico



Dilanti dia di Betico e pregunta ta surgi con importante Betico Croes ta pa historia di nos como pueblo? Ta interesante pa bo puntra Mike Eman, of sinta den Cas di Partido di AVP of bay un ceremonia na monumento 18 di maart pa bo scucha e contesta di AVP.

AVP ta splica cu Betico ta leu di ta e figura principal den nos historia. Mike ta divulga cu ta Henny Eman Sr. a cuminsa cu e lucha hunto cu 2147 ciudadano Arubiano

cu a firma un peticion pa La Reina, cu ta Shon A. Eman a entrega e peticion aki na La Reina, cu Henny Eman a duna contenido na e lucha door di rescata Aruba na ora di su Status Aparte y cu Mike Eman, nieto di Henny Eman Sr. ta e coronacion di e lucha cu a cuminsa na 1948 cu AVP. Den e narrativa aki Betico no ta nada mas cu un nota cu ta subraya e importancia di famia Eman den politica di Aruba. Na 2016 Mike a hasta laga Mito Croes pone e narrativa aki den un buki titula: "18 di maart. Honor y reconocimiento".

Pero, e narrativa di AVP ta falsifica nos historia. E dinastia Eman sigur tin su lugha den nos historia, pero Betico tabata e unico persona cu por a unifica nos pueblo pa realisa e reconocimiento oficial di e

pueblo aki tanto na nivel di Antiyas como na nivel di Reino. Nunca nos pais a conoce un lider, un comunicador y luchador mas efectivo cu Betico. Asina el a biba y asina el a bay laga nos. Advirtiendone contra materialismo y estimulando generacionnan nobo pa hisa e bandera di nos idealismo patriotico. Si nos kier para na banda di e berdad ta importante pa nos tin un bista claro di nos realidad historico.

Añanan prome cu Betico

E deseo pa autodeterminacion a cuminsa surgi durante añanan 20 di siglo 20. E tempo ey ainda Aruba su poblacion tabata hopi chikito y economicamente nos isla tampoco tabata representa mucho. Pero, cu e yegada di e refinancia nos economia a cuminsa florece y nos pobla-



cion a cuminsa crece lihe.

Ta den e ambiente di cambio aki nos consciencia politico a cuminsa florece. Den e ambiente aki Henny Eman bieu a lanta como lider, pero cu demasiado amor y lealtad na e monarkia Hulandes. Henny bieu a fomenta loke e tabata yama "separacion", bogando pa e transferencia di poder di Curaçao pa instancianan local, pa asina Aruba haya mas autonomia pa maneha su propio cas. Pero, su strategia tabata completamente enfoca riba derecho constitucional Hulandes. Esaki a keda demostra den añanan 30, ora Henny bieu y otro politiconan tabata boga pa Aruba bira un tipo di municipio Hulandes.

Henny Eman bieu a duna e esfuerzo aki pa realisa autonomia a base di derecho constitucional Hulandes un impulso nobo ora a busca colaboracion cu dr. Moises da Costa Gomez. Hunto nan a desaroya e idea pa prepara un peticion na Hulanda pa un status aparte pa Aruba, esta un status separa di e demas isla Caribense di Reino. Fin di añanan 40 Henny Eman Sr. a organiza 42 reunion pa un peticion cu 2147 firma. E idea aki a ser presenta riba 18 di maart 1948 na gobierno Hulandes pa e yiu di Henny, esta Shon A. Esaki a tuma lugha durante e Conferencia di Mesa Rondo na Den Haag cu tabata trata e reorganizacion di Reino. Shon A a continua cu e linea estatal aki te na su morto na 1967.

E politica revolucionario di Betico

Betico a rechasa e ruta di roga Hulanda na rudia. Durante añanan 70 Betico a scohe pa un liña revolucionario, exigiendo pa Hulanda reconece nos como pueblo, pasobra un pueblo tin e derecho di autodeterminacion. E strategia aki tabatin e forza pa resona internacionalmente y pone Hulanda bira nervioso, pasobra na aña 1970 Asamblea General di Nacionnan Uni a describi e derecho di pueblonan di e siguiente



forma den su Resolucion 2625: "tur pueblo tin e derecho di determina libremente, sin metemento externo, su condicion politico y di sigui su desaroyo economico, social y cultural, y tur estado tin e deber di respecta e derecho aki di acuerdo cu e disposicionnan di e Carta."

Ademas di determina e unico strategia exitoso pa reconocimiento di nos autodeterminacion, Betico ta e unico cu a pone nos kere den nos identidad como pueblo cu merece di ta soberano, fortaleciendo nos cu e simbolonan necesario, manera nos Papiamento. E lucha di Betico a keda intimamente reflecciona den nos bandera. Un bandera cu ta representa un isla dorna cu palma y rondona di santo blanco situa den lama grandi, unda solo semper ta briya. Pero, e mensahe di nos bandera ta bay mas profundo. Riba e tela blauw tin un strea cora cu blanco, di cuater punta, den skina ariba na man links.

E strea ta bisa nos cu Aruba tin un posicion di honor memey di e nacionnan cu ta rondona nos. E strea cora cu blanco tambe ta simbolisa e caracter amabel di nos pueblo, cu tin respet pa husticia, orden y libertad, pero cu semper ta dispuesto pa sacrifica hasta su sanger pa libertad, manera e indjannan a haci na Rooi Frances. E bandera ta enfatisa nos anhelo di ta soberano, pero sin isola nos mes di esnan cu ta rondona nos. Esaki ta ser simbolisa pa e dos strepi geel, mustrandone cu nos tur mester tin un posicion liber den e mesun lama blauw.

Betico su vision tabata idealista, cu e anhelo pa un clase trahado culto, prospero y podera. Promove un maneho basa riba principianan manera solidaridad, identidad nacional y tradicionnan cultural, en bes di un logica puramente individualista dirigi riba materialismo a corto plaso. P'esey nos mester celebra e bida y sacrificio di e unico lider cu tabatin e vision cu te dia di awe por sigui elva nos pais.

